



**Кодыр карсалөн пошта кудъясö мөдiсны дон босъттөг чөвтавны газет, йöзыс радлiсны: танi пö и телепрограмма, и лыдтөм-тшөттөм юөр, и шемөсмөдана выльтор!.. Буретш весьөпөртана гижөдъяснас и ылөдлiс челядь мывкыда лыддысьысьöс аслас налькйö наянысла «вижөдөм» пресса.**

**Кольөм вежонө татшөм СМИ-ясысь öти — «Про город» газет — йөзөдiс Эжваысь 2 арöса Надя Касеваöс виөм да гуалөм йылысь статья. Сэни жö — ньöти ретушируйттөм снимок, көни коньөр нывкакөд орччөн пукалө том морт. Бөръясö**

газетын «зілысьяс» пасійомаось Надюклон батын: тайо по яндысьтом синмыс юма кагос гуалан став сьомсо.

И колө од лоны, мый снимокысь «батысь» збыльвылас дзик мод морт! Оло-велөдчө Санкт-Петербургы, семья-челядь абу на лосьодлома дай Эжваса шог йывсьыс весиг пель рочнас абу кывлома. Но видлы эскөдны тайос Комиын олысь рөдвуж-төдсаыслы! «Про город» со мый юөртө да...

А газетыдлы йозыс пыр эскылісны, сы вөсна мый буретш сэтысь найө коркө төдмавлісны Октябрса революция, Ыджыд тыш, Победа, Гагарин йылысь юөрьяс. Журналист воккөд отув юкисны курыд шогсө да юмов радлунсө. Воясөн тайө отувъялуныс, ёртасьомыс пыр вынсяліс-ёнмис. Лыддысьысьлөн весиг дум эз вөв, мый коркө газетса вермас ылөдлыны сійос.

Рочьяс абу весь шуломаось налькын сыр йывсьыд. Та пөрийө сідзи жө артмис: мораль да этикалысь став корөмсө кедзөвтөмөн «сенсация» бөрся кыйөдчысьяс лэдзисны ру. Окота эськө мод ногөн тайос нимтыны, да ог нин... Асьныд гөгөрвоанныд.

Содта сөмын, «виж висьомөн нөрпалысь прессаыд» көть вөзийө асьсө дон босьттөг, такөд тшөтш гусьон суйө кос кисө лыддысьысьлөн зептө. Да нөшта ыдждөдлө асьсө журналистикаөн. Чөв! Прамой журналист төдө асьыс дон дай лыддысьысь ёртсө сьом ради некор оз вузав.

Лыддьөй «Коми му», «Чушканзі», «Войвыв кодзув», «Йөлөга», «Би кинь»... Тайөяс оз ылөдлыны, комиыд ылөдчан моданас, слабог, абу на пөжасьомаось.

Григорий ХАТАНЗЕЙСКИЙ.

